

30/05/2003

Projek khas papar sumbangan Dr Mahathir

KUALA LUMPUR: Sejarah pencapaian dan sumbangan Perdana Menteri, Datuk Seri

Dr Mahathir Mohamad, akan dipaparkan dalam satu projek khas dikenali 'A Legend Forever' (ALF) yang akan dilancarkan pada 17 Jun ini.

Pengarah Program ALF (Operasi), Rashid Mansur, berkata ALF bukan saja meringkaskan kehidupan Perdana Menteri yang berkhidmat paling lama di Asia

dalam bentuk cetakan, malah turut memasukkan biografi web dan laman web yang memfokuskan kejayaan dalam pembangunan dan peningkatan teknologi.

"ALF adalah projek yang memuatkan beberapa siri kejayaan dan sumbangan pemimpin negara termasuk Dr Mahathir sebagai pemimpin pertama.

"Pelancarannya pada 17 Jun ini akan diadakan di Sunway Lagoon Resort Hotel yang mana sebahagian daripada hasil jualan meja akan disumbangkan kepada Persatuan Orang Buta Malaysia (MAB)," katanya dalam satu kenyataan di sini, semalam.

Rashid berkata, pelancaran ALF akan disempurnakan Yang Dipertua Dewan Rakyat, Tun Mohamed Zahir Ismail.

Katanya, laman web itu akan menjadi landasan bagi memaklum dan memberi didikan kepada dunia mengenai Malaysia, pemimpin dan rakyatnya di samping memaparkan kejayaan dan sumbangan mereka seterusnya menghalang berita negatif disebar.